

BASES REGULADORAS E CONVOCATORIA DAS AXUDAS DIRECTAS EN ESPECIE PARA O FOMENTO E O APOIO Á NATALIDADE 2026

O artigo 39 da Constitución Española establece como un dos principios reitores da política social a protección social, económica e xurídica da familia.

Pola súa parte a Lei 13/2008, do 3 de decembro, de servizos sociais de Galicia, establece, como un dos obxectivos do sistema galego de servizos sociais, garantirlles o apoio ás familias como marco de referencia no que se desenvolven as persoas.

A Lei 3/2011, do 30 de xuño, de apoio á familia e á convivencia de Galicia, establece, no seu artigo 6, como principio reitor da actuación dos poderes públicos de Galicia, o apoio e a protección da familia como medio de transmisión da vida e como ámbito privilexiado para o desenvolvemento persoal; reconece, como un dos principios de responsabilidade pública, o de atender, apoiar e protexer as familias como núcleo fundamental da sociedade no cumprimento das súas funcións.

É unha realidade constatada á cal o Concello de Lalín non é alleo, a existencia dun continuado decrecemento da poboación desde fai anos, que obriga aos poderes públicos a actuar tomando medidas que dalgún xeito contribúan a paliar esa sangría demográfica e a fixar poboación.

Por outro lado a precariedade laboral, a insuficiencia de recursos adecuados para a conciliación da vida familiar e laboral, o atraso na idade de emancipación dos nosos mozos e mozas, son algúns dos factores que inflúen na diminución da natalidade, que é, sen dúbida, un dos principais problemas aos que debe facer fronte a nosa sociedade nos vindeiros anos.

É por elo que a través destas axudas o Concello de Lalín quere contribuir a paliar o custo aparelado á crianza dos fillos e fillas alomenos nos primeiros momentos.

Tendo en conta o exposto anteriormente e ao amparo da Lei 7/1985, reguladora das bases de réxime local, da Lei 39/2015, do 1 de outubro, do procedemento administrativo común das administracións públicas, da Lei 40/2015, do 1 de outubro, do réxime xurídico do sector público, da Lei 38/2003, do 17 de novembro, xeral de subvencións e do seu regulamento aprobado por Real Decreto 887/2006 do 21 de xullo, da Lei 9/2007, do 13 de xuño, de subvencións de Galicia así como das Bases de execución do orzamento do Concello de Lalín para o ano 2026, o Concello de Lalín convoca unha liña de subvencións destinadas a fomentar e apoiar á natalidade no noso concello



BASES

PRIMEIRA.- OBXECTO E FINALIDADE

1.1. O obxecto destas bases é regular a concesión dunha axuda directa en especie a aquelas familias que durante o ano 2026 teñan un fillo ou filla, adopten, sexan declaradas en situación de garda con fins adoptivos ou ben acollan de xeito permanente as crianzas que dan dereito á axuda.

1.2. A finalidade destas axudas é fomentar e apoiar a natalidade no Concello de Lalín contribuíndo a paliar o custo aparelado á crianza dos fillos e fillas alomenos nos primeiros momentos.

SEGUNDA.- NATUREZA DAS AXUDAS

As axudas reguladas nestas bases configúranse como axudas en especie ao abeiro do disposto na Disposición Adicional quinta da Lei 38/2003 de 17 de novembro xeral de subvencións así como no artigo 3 do Real Decreto 887/2006 do 21 de xullo polo que se aproba o regulamento da Lei 38/2003.

O Concello de Lalín adquirirá os bens obxecto da axuda coa finalidade exclusiva de entregalos a terceiros.

Eses bens a adquirir para a súa entrega serán uns lotes de produtos de puericultura.

TERCEIRA.- PLAN ESTRATÉXICO DE SUBVENCIÓNS E FINANCIAMENTO

3.1 As axudas reguladas nestas bases intégranse no Plan Estratéxico de Subvencións do Concello de Lalín para o ano 2026 aprobado por acordo da Xunta de Goberno Local de data 27 de febreiro de 2026 e modificado por acordo da Xunta de Goberno Local de data 19 de xuño de 2026, encadrándose na liña 3 do dito plan (subvencións de cooperación, solidariedade e desenvolvemento humano).

O obxectivo estratéxico desta liña é o apoio ás persoas e colectivos máis desfavorecidos ou con máis dificultades, financiando iniciativas que axuden a diminuír as desigualdades e a incrementar e contribuír a mellorar as súas condicións de vida.

3.2 Dado que as axudas reguladas ao abeiro destas bases son axudas en especie, deben adquirirse os bens para ser entregados e o gasto de adquisición farase efectivo con cargo á aplicación orzamentaria





231/48918/01 ata un importe máximo de 12.000 euros , correspondente ao orzamento do Concello de Lalín para o ano 2026.

CUARTA.- PUBLICIDADE

Estas bases reguladoras publicaranse no Boletín Oficial da provincia de Pontevedra (BOPPO) e con posterioridade remitirase a convocatoria á Base de Datos Nacional de Subvencións (BDNS) que será a que lle dea traslado do seu extracto ao BOPPO.

QUINTA.- PROCEDEMENTO DE CONCESIÓN

O procedemento de concesión é o de concorrência non competitiva, de acordo co disposto no artigo 19.2 da Lei 9/2007, do 13 de xuño, de subvencións de Galicia, dado que, de acordo coa finalidade e obxecto do programa, non resulta necesario realizar a comparación e prelación das solicitudes presentadas, senón que a concesión da axuda se realiza pola comprobación da concorrência na persoa solicitante dos requisitos establecidos ata o esgotamento do crédito orzamentario.

A concesión levarase a cabo baixo os principios de publicidade, transparencia, concorrência, obxectividade, igualdade e non discriminación, eficacia no cumprimento dos obxectivos fixados pola Administración outorgante e eficiencia na asignación e utilización dos recursos públicos.

SEXTA.- BENEFICIARIAS E REQUISITOS

6.1.- Poderán ser beneficiarias destas axudas aquelas persoas que sexan

- Proxenitoras dunha crianza nacida entre o 1 de xaneiro de 2026 e o 31 de decembro de 2026.
- Adoptantes, declaradas en situación de garda con fins adoptivos ou que acollan de xeito permanente un/unha o máis menores, sempre que a constitución da adopción, a declaración de garda con fins adoptivos ou o acollemento familiar permanente teña lugar entre o 1 de xaneiro de 2026 e o 31 de decembro de 2026.

6.2.- Os requisitos para poder solicitar a axuda son os seguintes:

- Tódolas persoas integrantes da unidade familiar deben figurar empadroadas no Concello de Lalín no momento da presentación da solicitude e permanecer empadroadas durante os dous



anos seguintes á concesión da axuda. Este requisito será comprobado de oficio polo órgano instructor do procedemento e o seu incumprimento dará lugar ao reintegro da axuda percibida.

- O/a menor que causa dereito a axuda debe igualmente figurar empadroado/a no Concello de Lalín no momento da presentación da solicitude

6.3.- Entenderase por unidade familiar a formada polas persoas proxenitoras, ou a persoa proxenitora e o/a cónxuxe ou persoa con análoga relación de afectividade, xunto con:

1º. As fillas e os fillos menores, agás que, con consentimento do/da pai/nai, vivan de xeito independente.

2º. As fillas e os fillos maiores de idade con medidas xudiciais de apoio a persoas con discapacidade

3º. As fillas e os fillos maiores de dezoito anos cun grao de discapacidade superior ao 33 por cento.

4º. As menores e os menores adoptados, en situación de garda con fins adoptivos ou en acollemento familiar permanente

No caso de divorcio ou separación legal da nai e o pai non se considerará membro computable aquel que non conviva co/a menor, agás nos casos de custodia compartida .

6.4.- No caso de que a persoa solicitante sexa estranxeira, terá que cumprir, ademais, o establecido na LO 4/2000, do 11 de xaneiro, sobre dereitos e liberdades dos/as estranxeiros/as en España e a súa integración social.

SÉTIMA.- OBRIGAS DAS BENEFICIARIAS

7.1.- Son obrigas das persoas beneficiarias das subvencións as sinaladas no artigo 14 da Lei 38/2003 xeral de subvencións así como no artigo 11 da Lei 9/2007, do 13 de xuño, de subvencións de Galicia.

7.2.- Asimesmo, as persoas beneficiarias obríganse a:

a) Someterse ás actuacións de comprobación a efectuar polo órgano concedente, así como calquera outras de comprobación e control que poidan realizar os órganos de control competentes.



b) Comunicar calquera cambio ou variación que se produza nos requisitos e condicións determinantes do outorgamento da subvención, no prazo de 15 días hábiles, contados a partires do seguinte a aquel en que se produzan.

c) Permanecer empadroadas tódolas persoas integrantes da unidade familiar no Concello de Lalín durante o prazo de dous anos a contar desde a concesión da axuda

OITAVA.- CONTÍA DA AXUDA

A axuda consistirá nun lote de produtos de puericultura con valor máximo de adquisición de 160 euros IVA incluído.

Cada crianza nacida, adoptada, en situación de garda con fins adoptivos ou acollida dará dereito a unha única axuda a favor da persoa solicitante.

NOVENA.- SOLICITUDES E DOCUMENTACIÓN

9.1.-As solicitudes de axuda deberán presentarse no modelo normalizado de solicitude que figura como Anexo I.

Achegarase a seguinte documentación complementaria

- Dni da persoa solicitante
- Copia do libro de familia ou certificado de nacemento expedido polo Rexistro Civil
- No seu caso, copia da resolución xudicial ou administrativa que declare a adopción, a garda con fins adoptivos ou o acollemento familiar permanente
- No seu caso, sentenza de separación ou divorcio e convenio regulador das relacións paterno filiais.
- Compromiso das persoas integrantes da unidade familiar de seguir empadroadas no Concello de Lalín durante o prazo previsto nestas bases. Anexo II
- Unha declaración responsable de non estar incurso/a nas prohibicións previstas no artigo 13 da Lei 38/2003, do 17 de novembro, Xeral de Subvencións, para obter a condición de beneficiario/a, substituíndo esta declaración á presentación de certificacións na acreditación do cumprimento das obrigas tributarias e coa Seguridade Social, por tratarse dun dos supostos previstos na letra e) do artigo 31.7 da Lei 9/2007, do 13 de xuño, de Subvencións de Galicia. Anexo III



Comprobarase de oficio que a persoa solicitante se atopa ao corrente coa facenda local así como a situación da unidade familiar en relación co padrón municipal.

9.2.-As solicitudes presentaranse preferiblemente por vía telemática a través da sede electrónica do Concello de Lalín empregando o formulario de solicitude de subvención directa a adxuntando o Anexo I que estará dispoñible na sede electrónica e na páxina web do Concello de Lalín así como a documentación complementaria sinalada no punto anterior

Opcionalmente, poderanse presentar as solicitudes presencialmente perante o rexistro xeral do Concello de Lalín

9.3.- O prazo de presentación de solicitudes estará aberto desde o día seguinte ao da publicación do extracto da convocatoria no Boletín Oficial da Provincia ata o 31 de decembro de 2026.

Para aqueles nacementos , adopcións, gardas con fins adoptivos ou acollementos familiares permanentes que se produzan no mes de decembro de 2026 o prazo estará aberto ata o 20 de xaneiro de 2027.

DÉCIMA.- EMENDA DAS SOLICITUDES

Se a solicitude non está debidamente cuberta ou non se presenta a documentación esixida, o órgano instructor encargado da tramitación do expediente requirirá á persoa solicitante para que, no prazo máximo de dez (10) días hábiles, emende a falta ou achegue os documentos preceptivos, coa advertencia de que, de non o facer, se considerará que desistiu da súa solicitude, de acordo co previsto no artigo 20.5 da Lei 9/2007, do 13 de xuño, de subvencións de Galicia, e no artigo 68 da Lei 39/2015, do 1 de outubro, do procedemento administrativo común das administracións públicas, logo de que se dite resolución nos termos previstos no artigo 21 da citada lei.

DÉCIMOPRIMEIRA.- INSTRUCCIÓN DO PROCEDEMENTO

A instrucción do procedemento corresponderalle a un técnico/a do Concello de Lalín, quen realizará de oficio cantas actuacións estime necesarias para a determinación, coñecemento e comprobación dos datos en virtude dos cales debe formularse a proposta de resolución, comprendendo as actividades descritas no artigo 24 da Lei 38/2003. Este proceso efectuarase de forma continuada segundo a orde de recepción de solicitudes.



As axudas tramitaranse por un procedemento abreviado no que o órgano instructor lle formulará directamente ao órgano concedente a proposta de resolución, tras comprobar a concorrencia dos requisitos esixidos.

No expediente de concesión das subvencións deberá figurar o informe do órgano instructor no que conste que da información que obra no seu poder se desprende que as persoas solicitantes cumpren os requisitos esixidos.

O órgano instructor, á vista do expediente, elevará proposta de resolución á Xunta de Goberno Local, órgano competente para resolver por ter delegada a competencia da Alcaldía, sen prexuízo da posible avocación de competencia que poida producirse por causas debidamente xustificadas.

DÉCIMOSEGUNDA.- RESOLUCIÓN

A Xunta de Goberno Local resolverá o expediente de concesión de subvencións. Na tramitación do expediente estarase ó disposto nas Bases de execución do orzamento municipal para o ano 2026.

O prazo máximo para resolver e notifica-la resolución do procedemento non poderá exceder de 6 meses dende o día da presentación da solicitude.

A notificación levarase a cabo de acordo co establecido nos artigos 40 e seguintes da Lei 39/2015, de 1 de outubro, do procedemento administrativo común das administracións públicas.

Sen prexuízo da obriga de resolver, de acordo co disposto nos artigos 21 e 22 da Lei 39/2015, o transcurso do prazo máximo sen terse notificado a resolución lexitima ás persoas interesadas para entender desestimada por silencio administrativo a solicitude de concesión da subvención.

De conformidade co disposto no artigo 18 da Lei 38/2003, de 17 de novembro, xeral de subvencións e no artigo 17 da Lei 1/2016, do 18 de xaneiro, de transparencia e bo goberno, publicarase a concesión destas axudas na Base de Datos Nacional de Subvencións.

En caso de esgotamento do crédito, publicarase o dito esgotamento no Boletín Oficial da Provincia de Pontevedra así como na sede electrónica do Concello e inadmitiranse a trámite as solicitudes presentadas con posterioridade.



DÉCIMOTERCEIRA .- MODIFICACIÓN DA RESOLUCIÓN

Toda alteración das condicións tidas en conta para a concesión da subvención e, en todo caso, a obtención concorrente de subvencións ou axudas outorgadas por outras administracións ou entes públicos ou privados, poderá dar lugar á modificación da resolución de concesión, segundo o artigo 17.4 da Lei 9/2007, do 13 de xuño, de subvencións de Galicia

DÉCIMOCUARTA .- XUSTIFICACIÓN

Tendo en conta que as axudas previstas nestas bases se conceden en atención á concorrencia nas persoas beneficiarias da situación prevista na base primeira, de acordo co artigo 28.9 da Lei 9/2007, do 13 de xuño, non se requirirá a rendición da conta xustificativa regulada nese artigo, sen prexuízo, en todo caso, da necesaria acreditación da situación que xustifica a concesión da subvención previamente á súa concesión e o cumprimento das obrigas materiais e formais establecidas nestas bases.

En todo caso a xustificación da axuda quedará documentada mediante a sinatura por parte da persoa beneficiaria no momento da entrega do lote, da acta de entrega que figura como Anexo IV.

DÉCIMOQUINTA.- PAGAMENTO

Ao tratarse dunha axuda en especie, non haberá transferencia de fondos a favor das persoas beneficiarias, substituíndose esta pola entrega dos subministros adquiridos consistentes nuns lotes de produtos de puericultura.

Por elo e de forma simultánea instruirase o correspondente expediente de contratación para o subministro dos bens en que consiste a axuda.

DÉCIMOSEXTA.- COMPATIBILIDADE CON OUTRAS AXUDAS

As subvencións recollidas nestas bases son compatibles coa percepción doutras subvencións, axudas ou ingresos para a mesma finalidade.



DÉCIMOSEPTIMA.- REINTEGRO E SANCIÓN

17.1. O incumprimento das obrigas contidas nestas bases reguladoras, ou demais normativa aplicable, así como das condicións que, se é o caso, se establezan na resolución de concesión, dará lugar á obriga de devolver a subvención percibida, así como os xuros de demora correspondentes.

Para facer efectiva a devolución a que se refire o punto anterior, tramitarase o oportuno procedemento de reintegro, que se axustará ao previsto no título II da Lei 38/2003 xeral de subvencións así como na Lei 9/2007 de subvencións de Galicia.

No suposto de que se declare a procedencia do reintegro considerarase como cantidade recibida a reintegrar, un importe equivalente ao prezo de adquisición do ben entregado xunto cos correspondentes xuros de mora.

17.2. As persoas beneficiarias das subvencións quedarán sometidas ás responsabilidades e réxime sancionador establecidos no título IV da Lei 38/2003 xeral de subvencións así como na Lei 9/2007 de subvencións de Galicia.

DÉCIMO OITAVA.- CONTROL

18.1. O Concello de Lalín poderá levar a cabo as actividades de control que considere oportunas para vixiar o cumprimento das axudas reguladas nesta convocatoria.

18.2. Todas as axudas estarán sometidas á función interventora e de control financeiro exercida pola Intervención do concello de Lalín, nos termos que establecen o título III da Lei 9/2007, do 13 de xuño, de subvencións de Galicia, as bases de execución do orzamento municipal e o Real Decreto 424/2017 de 28 de abril polo que se regula o réxime xurídico de control interno nas entidades do sector público local.

DÉCIMO NOVENA.- PROTECCIÓN DE DATOS

En cumprimento do Regulamento da Unión Europea 2016/679, sobre protección de datos de carácter persoal, da Lei Orgánica 3/2018, do 5 de decembro, de protección de datos persoais e garantía dos



dereitos dixitais e das demais disposicións vixentes na materia, infórmase que:

RESPONSABLE: O Concello de Lalín é o responsable dos datos persoais facilitados polas persoas solicitantes.

FINALIDADE: A finalidade da súa recollida e tratamento é a instrución e resolución do procedemento para a concesión das axudas directas en especie para o fomento e o apoio á natalidade no Concello de Lalín, a práctica das publicacións, comunicacións e notificacións de obrigado cumprimento, o seguimento e comprobación da/s axudas.

DESTINATARIOS: Poderán ser cedidos a outras Administracións, organismos e institucións, asumindo estas as obrigas dos responsables de tratamento de datos. Tamén poderán ser cedidos en cumprimento dun mandato legal ou xudicial e verificados e cotexados con calquera outros dos que as demais Administracións dispoñan a fin de comprobar a súa exactitude e veracidade.

LEXITIMACIÓN: A base lexitimadora do tratamento previsto reside no consentimento expreso das persoas que representan ás entidades solicitantes e no exercicio lexítimo das competencias municipais atribuídas pola normativa de réxime local.

DEREITOS: As persoas interesadas poden exercer os dereitos de acceso, rectificación, supresión, oposición, limitación do tratamento e portabilidade así como opoñerse á toma de decisións individuais automatizadas, incluída a elaboración de perfís, na forma prevista na normativa vixente, perante o órgano responsable do ficheiro–Concello de Lalín–. Así mesmo, teñen dereito a presentar unha reclamación perante a Axencia Española de Protección de Datos (www.aepd.es). Disporán de máis información na web municipal ou contactando co delegado de protección de datos no enderezo : dpd@lalin.gal.

DISPOSICIÓN ADICIONAL ÚNICA

A participación nesta convocatoria supón a aceptación destas bases reguladoras.

Para os supostos non previstos nas presentes bases serán de aplicación as normas incluídas nas Bases de execución do orzamento do Concello de Lalín para o ano 2026, na Lei 9/2007 do 13 de xuño, de subvencións de Galicia e na Lei 38/2003, do 17 de novembro, xeral de subvencións e o seu regulamento aprobado por Real Decreto 887/2006 do 21 de xullo

